



FJÖLBRAUTASKÓLI  
VESTURLANDS

## Annáll vorannar 2016

Kennsla á vorönn 2016 hófst þriðjudaginn 5. janúar. Kennslu lauk miðvikudaginn 4. maí og síðustu próf voru haldin 19. maí. Önninni lýkur svo þegar skólameistari slítur þessari samkomu og þeir 37 nemendur sem nú útskrifast hafa fengið skírteini sín afhent.

Í febrúar voru nemendur Fjölbrautaskólans 517 sem er svipað og á vorönn 2014 en nokkur fjölgun frá vorönn 2016 .

Eldri nemendur, fæddir 1990 og fyrr, eru um 24% nemenda skólans sem er fjölgun frá síðustu vorönn. Stærsti hluti fullorðinna nemenda er í svokölluðu dreifnámi. Dreifnámsnemendur eru í fjarnámi en mæta í skólann nokkrum sinnum á önninni, gjarnan á kvöldin og um helgar. Þannig getur fólk sótt skóla en jafnframt stundað vinnu. Dreifnámið hefur einnig gert fólki sem býr utan Akraness mögulegt að ljúka námi þó það sé komið yfir hefðbundinn skólaaldur og sé í fullri vinnu í sinni heimabyggð. Þessir nemendur stunda nám í vélvirkjun, húsasmíði, húsgagnasmíði, sjúkraliðanámi og meistaranámi.

Fjöldi nemenda 16 til 20 ára er svipaður og verið hefur. Á þessari önn eru karlar 61% nemenda skólans en konur 39%. Það eru aðeins fleiri konur en karlar á stúdentsbrautum en karlar eru í miklum meirihluta í iðnnáminu og meistaranámi en konur í sjúkraliðanámi.

Nú í lok vorannar láta þrír kennarar af störfum en það er þau Halla Ingibjörg Guðmundsdóttir, Linda Dröfn Jóhannesdóttir og Haraldur Gylfason. Eru þessum starfsmönnum færðar þakkir fyrir störf þeirra við skólann. Gunnar Magnússon kennari kemur úr leyfi á næstu önn og þau Steinunn Eva Þórðardóttir, Eiríkur Guðmundsson og Helena Valtýsdóttir verða í námsleyfi á næsta skólaári. Dröfn Viðarsdóttir tók við starfi aðstoðarskólameistara í upphafi þessarar annar og Jónína Halla Víglundsdóttir tók við starfi áfangastjóra.

Það var mikið um að vera í skólanum á þessari önn. Meðal þess voru Opnir dagar og árshátíð var haldið í mars sem og stærðfræðikeppnin fyrir grunnskóla.

Nemendur tíundu bekkja Brekkubæjarskóla, Grundaskóla og Heiðarskóla heimsóttu okkur í febrúar og fengu leiðsögn um skólann í fylgd nemenda Fjölbrautaskólans. Kynningin tókst vel og er nemendum okkar sem tóku þátt í þessu færðar þakkir fyrir þeirra framlag. Nemendur 10. bekkjar Kleppjárnsreykjaskóla heimsóttu okkur einnig á önninni.

Opið hús var haldið í febrúar þar sem nemendur og forráðamenn gátu komið og kynnt sér skólann. Auk þess fór skólameistari ásamt nemendum í kynningaferðir í grunnskóla á Vesturlandi.

Í febrúar var haldið skólaþing þar sem nemendur ræddu málefni skólans. Öllum nemendum skólans var skipt í nokkra hópa. Þau ræddu málefni að eigin vali og greiddu síðan atkvæðu um hvaða tillögur þau vildu setja á oddinn. Í kjölfar þingsins var haldinn skólafundur á sal skólans með þátttöku allra nemenda og starfsmanna skólans.



FJÖLBRAUTASKÓLI  
VESTURLANDS

Leiklistarklúbburinn setti upp leikritið Fullkomið brúðkaup, flott sýning þar sem mikið var hlegið.

Það var mikið að gera í tónlist hjá nemendum skólans og fenguð við þrisvar sinnum að fagna góðum árangri með þeim hér á sal. Fyrst tóku þau Símon Orri Jóhannsson og Halla Margrét Jónsdóttir þátt í hæfileikakeppninni „Ísland got Talent“ og urðu þar í öðru sæti, þá tóku þau Jóna Alla Axelsdóttir og Ari Jónsson þátt í söngvakeppni framhaldsskólanna fyrir hönd FVA og urðu þau einnig í öðru sæti. Nemendur starfsbrautar tóku þátt í hæfileikakeppni starfsbrauta og sigruðu þá keppni með skemmtilegu söngatriði.

Það var ekki bara í söng sem nemendur fögnuðu góðum árangri heldur einnig í íþróttum þar sem nemendur í FVA fögnuðu sigri í ýmsum íþróttagreinum.

Á þessari önn var hafið átak í að bæta starfsaðstöðu málmiðgreina en það er sú deild innan skólans sem býr við lakastan tækjakost. Haldin var samkeppni um nafn á átakingu, „Málmur er málið“ varð fyrir valinu.

Í byrjun apríl fóru 20 nemendur ásamt 2 kennurum til Slóvakíu en þar tóku þau þátt í verkefni um sjálfbærni og sjálfbæra orku.

14. apríl var haldin Tæknimessa hér í skólanum. Markmið tæknimessunnar var að kynna fyrir grunnskólanemendum hversu miklir möguleikar eru á góðum störfum í iðngreinum. Öllum nemendum í 8., 9. og 10. bekk grunnskóla á Vesturlandi var boðið að koma hingað í FVA, auk þess sem nemendum hér var boðið að skoða sýninguna. Hér fengu þau kynningu frá um 20 iðnfyrirtækjum auk kynninga á því verknámi sem boðið er upp á hér við skólann. Mikil ánægja var með þessa nýjung og stefnt er að því að endurtaka hana í framtíðinni.

Aðalstjórn nemendafélagsins nú á vorönn var skipuð eftirtöldum nemendum: Sævar Berg Sigurðsson kjörinn formaður og með honum í stjórn voru Einar Björn Þorgrímsson, Finnur Ari Ásgeirsson, Jón Hjörvar Valgarðsson, Linda María Rögnvaldsdóttir og Magðalena Lára Sigurðardóttir.

Á þessari önn voru eftirtaldir nemendur í forsvari fyrir klúbba nemendafélagsins: Elmar Gísli Gíslason og Anna Eze fyrir Viskuklúbb, Sveinn Þór Þorvaldsson fyrir Ljósmyndaklúbb, Aðalsteinn Bjarni Valsson og Sindri Snær Alfreðsson fyrir Tónlistarklúbb, Atli Vikar Ingimundarson og Jón Hjörvar Valgarðsson fyrir Íþróttaklúbb og Brynja Rún Björnsdóttir og Sunneva Lind Ólafsdóttir fyrir Leiklistarklúbb.

Við þökkum nemendum fyrir vel unnin störf að félagsmálum.

**Ný stjórn nemendafélagsins fyrir næsta skólaár var kosin í apríl.** Formaður fyrir næsta skólaár var kjörinn Jón Hjörvar Valgarðsson. Með honum í stjórn verða Einar Björn Þorgrímsson, Bjarki Aron Sigurðsson, Hrafnhildur Arin Sigfúsdóttir, Brynja Rún Björnsdóttir og Ólafur Valur Sigurðsson. Fulltrúi nýnema í stjórn NFFA verður síðan kosinn í ágúst.

Á þessari önn fengum við samþykki Menntamálastofnunar fyrir nýju þriggja ára stúdentsbrautunum. Vinna við gerð nýrra námskráa í iðnnámi er í vinnslu og er m.a. búið að



FJÖLBRAUTASKÓLI  
VESTURLANDS

sækja um að tilraunakenna nýja námsbraut húsasmíði á næsta skólaári. Sú braut var unnin í samvinnu við Fjölbrautaskólann í Breiðholti.

Á þessari önn var stofnað gæðaráð sem hefur það hlutverk að endurskoða innra mat skólans og búa til gæðahandbók. Þetta hefur gengið vel og verður framhaldið í haust.

Ein af þeim nýjungum sem teknar voru upp á síðasta skólaári er afreksíþróttasvið. Það er unnið í samstarfi við Akraneskaupstað og Íþróttabandalag Akraness. Þar gefst afreksíþróttanemendum kostur á að stunda íþróttir að hluta til á skólatíma. Verkefnið er búið að ganga mjög vel og verður því haldið áfram í haust.

Stefnt er að auknu samstarfi milli okkar og tónlistarskólans. Nemendum gefst nú kostur á að stunda nám í tónlist sem hluta af námi á tónlistarsviði opinnar stúdentsbrautar.

Læt ég nú lokið annáli vorannar 2016 og óska ykkur sem útskrifist frá skólanum til hamingju með þann áfanga sem þið hafið nú náð. Þið megið vera stolt af því að hafa lokið námi við Fjölbrautaskóla Vesturlands og við sem hér störfum erum stolt af ykkur og því sem þið vinnið gott í framtíðinni.

Dröfn Viðarsdóttir